





梅會詩選卷第三

李稻集編次

竹垞古體詩三十六首

夏至日為屠母壽

臨高臺將進酒君提壺我鼓缶君子且勿諠小人鼓缶
歌一言我昔從東海上親見上元夫人指爪長長鬢髮
翩翩吹瑤笙擊石鼓宴者誰有金母投壺玉女為客豪
青蚪白鹿相招邀鍾山之李綏山桃李如餅桃如斗得
而食之皆老壽今日高堂上壽稱觴一年三百六十日
三百五十九日無如此日長

逢姜給事塚

黃門先生官左掖力欲拔山氣辟易虎豹天關閉九重

孤臣血肉徒狼藉東來蜃市易沉淪南國相逢淚滿巾
青鞵布韉江湖外誰念當時折檻人

喜羅浮屈五過訪

春風蝴蝶飛綠草南園遍知是麻姑五色裙羅浮山下
曾相見開門一笑逢故人遠來問我桃花津若非綠玉
杖定跨黃麒麟不然出入京雒一萬里何為布素無緇
塵相知樂莫樂不用金箱圖五岳況今天地多戰爭赤
城華頂風煙驚山陰道士不得見四明狂客誰相迎由
拳城南春可惜竹石如山水千尺從此扁舟范蠡湖長
歌來往裴休宅

蘭亭行贈朱大士曾

右軍三十三修禊蘭亭中一書蘭亭序天矯宛若天門
龍我今生年與之同秋蛇春蚓百不工竭來山陰道柳
青桃復紅車如鷄栖馬如狗空使林泉落吾手朝來蠟
屐思入山雨急風顛重回首吾宗顙也書絕倫頻過論
書仍論文臨池就我一題扇世上俗學徒紛紛持觴勸
君且傾倒晴日今年去年少曲水東流不待人春風吹
徧蘭亭草

寒夜集燈公房聽韓七山人昌彈琴兼送屈五還

羅浮

韓生燕市來夜向招提宿本是悲歌擊筑人援琴為鼓
清商曲安絃操縵夜三更良久徘徊不出聲坐使閒心

遠方聞逸響生商風泠泠七絃遍天馬空山忽不見石
上爭流三峽泉平沙亂落瀟湘鴈聞道清商固最悲不
如清角更淒其一彈試奏思歸引再轉重愁雙燕離此
時晨鐘猶未撞月露霜華滿深巷四座無言歎息頻篝
燈欲滅風升降羅浮道士思幡然忽憶朱明舊洞天種
得梅花凡幾樹泥成丹竈已千年雲中告歸從此始四
百三十六峯裏入海能馴海客鷗攜琴便駕琴高鯉

將至永嘉曹侍郎餞予江上吳客韋二丈爲彈長
亭之曲并吹笛送行歌以贈韋即送其出塞

韋郎舊隸羽林籍曾向營門教吹笛不聽吳中白雪音
定呼鄴下黃鬢客平原相見轉相親置酒誇君坐上賓

下若尊壘朝未罄東山絲竹夜還陳閒來坐我花間奏
玉洞飛泉嚮巖溜古調多傳關馬詞新聲似出康王授
問我東行到海壖日斜江上慘離筵還將北鴈南飛曲
催送錢塘楚客船船人搥鼓津頭泊紅葉千山富春郭
忽作邊秋出塞聲江楓岸柳紛紛落哀絃促管不堪聽
賓御聞之亦涕零挂席遠移巖子瀨看山直上謝公亭
聞君欲問雲中戍雪消飲馬長城去廣武營邊折柳時
黃瓜阜上題書處司農舊是出羣才此日征西幕府開
試向尊前歌一曲梅花飛徧李陵臺

金華道上夢遊天台歌

吾聞天台山高一萬八千丈石梁遠挂藤蘿上飛流直

下天際來散作哀湍衆山響燭龍銜日海風飄猶是天
雞夜半潮積雨自懸華頂月明霞長建赤城標我向金
華問客程蘭谿谿水百尺清金光瑤草不可拾夢中忽
遇皇初平手攜綠玉杖引我天台行天台山深斷行路
亂石如羊紛可數忽作哀猿四面啼青林綠篠那相顧
我欲吹簫駕孔鸞璿臺十二碧雲端入林未愁苔徑滑
到面但覺松風寒松門之西轉清曠桂樹蒼蒼石壇上
雲鬟玉洞展雙扉二女明粧儼相向粲然啓玉齒對客
前致詞昨朝東風來吹我芳樹枝山桃花紅亦已落問
君採藥來何遲曲房置酒張高宴芝草胡麻迭相勸不
記仙源路易迷樽前只道長相見覺來霜月滿城樓恍

忽天台自昔遊仍憐獨客東南去不似雙谿西北流

蔣廣文薰留飲縉雲學舍為談仙都之勝

軒后丹砂就乘龍上紫清不知滄海畔亦有鼎湖名故
人家住梅谿上渡口扁舟日來往一別柴門已二年看
山忽作仙都長要予松下飯胡麻言自仙都道士家時
有仙童來海市或看玉女載河車一朝風雨青天注馬
跡龍髯不知處蓮花一片天上來從風飄落東陽去東
陽游女弄潺湲素舸緣流濯足還笑拾飛花看不足當
歌明月出雲間廣文先生居四壁青山無數堂階側采
藥曾迷阮客蹤窪樽舊是陽冰宅君去仙都訪道書金
龍玉簡定何如他時儻入神仙窟攜手同騎白鯉魚

朱碧山銀槎歌孫少宰席上賦

高堂宴客客未醉主人愛客期開顏羽觴玉爵詎足算
勸我鑿落重三緩槎枒老樹幾千歲霜皮崩剝枝柯刪
陰崖自遭鬼斧劈積雨暗齧苔紋斑尋源之使出想像
高踞兩膝頂禿鬚觀其傲岸意獨得髣髴歸自明河灣
流傳河畔逢織女所恨尚少雙煙鬟剗中鄉衡入其腹
未解刀削何由彎傳之四座叫奇絕有如白鳥飛翩翩
細看款識刻至正問誰為此朱碧山良工名盛心益苦
顧茲毋乃經營艱主人博搜金石文向我更話天歷間
丹叩先生愛奇古命製芝菌如初攀當時虞揭相獻酢
是物亦得流人寰自從闖賦躡燕市大掠金帛仍西還

紛紛入肆尋鍛冶否亦道半委榛菅聞之不覺三歎息
可憐雙鯨今成鰥吾鄉藝事多絕倫奇巧不數古輸班
張銅黃錫近乃出未若此老技最嫻殊方促坐但醪酖
莫遣酒醒懷鄉關

和程

遠

龍尾硯歌為方侍御

亨咸

作即送其入粵

硯有辛卯米芾四字
印舊藏黃公道周家

龍眠柱史饒硯癖篋藏龍尾開深窪雀臺古瓦詎比數
石未未許青州誇黝如純漆久欲脫粹若水玉堅新剗
中央私印尚可識流傳乃自元章家騷人生年記辛卯
初度肇錫名何嘉十桴彙開見八八兩已相背無佞邪
當其片石始入手重之豈易黃金車雲峯模糊潑急雨

雪繭夭矯騰修蛇東都淪後內庫發重寶散失同紛麻
赤瑠玉英半缺折物理所貴韜其華流傳迄今六百載
山骨完好無纖瑕黃公昔年在漳浦以此注易緯蒼牙
嗚呼聚散勢所必精靈呵護靡幽遐房融有硯譯梵字
遺蹟尚爾矜僧伽平公巨璞本光滑少陵野老猶咨嗟
沉茲貞質世鮮兩宜爲有識羣高奢前歸大滌後麗谷
顛人地下應哈呀黃海布衣嗜奇最吟成古調毆淫哇
盤空硬語難驟讀詩膽直欲凌劉义謂余吾歌子當和
答云四座且莫譁我昔南游度大庾羚羊峽口戈船划
手披煙液入巖穴硎礪魄碗圍周遮石紋蘊秀各異狀
就中最美數青花有時精氣凝作眼碧者鸚鵡黃者鴉

火輪奔處界微白宛似蕉葉抽春芽其餘瑣細盡當辨
黃龍翠羽兼丹砂爭如此石鐵色古稜角漸去成硯啞
柱史聞之忽狂叫便欲五嶺探雲霞隋隄三月送君去
柳絲藤蔓何麤筆黯然消菟萬里別長言不覺肆滂葩

汪舍人

懋麟

以丁孃子布見贈賦寄

丁孃子爾何人織成細布光如銀舍人笥中剛一疋贈
我爲衣禦冬日感君戀戀情莫踰重之不異貂襜褕攜
歸量幅二尺闊未數星紈與荃葛曬卻渾如飛瀑懸看
來只訝神雲活爲想鳴梭傍碧窗摻摻女手定無雙浣
時應值湔裙水漂處除非濯錦江長安城中盛衣馬此
物況思六街寡裁作輕衫春更宜期君再醉天壇下天

檀三月踏青時領邊短鬢風吹絲試尋油壁香車路追
逐紅禪錦髻兒

題元張子正林亭秋曉圖同高層雲賦

一峯畫品最緻密逾三百載流傳稀今人摹仿目未睹
但取率畧屏紆威殘山賸水不數點豈惟神異貌亦非
當時藝事許入室華亭張中稱庶幾即如此圖乃學井
西王生筆林亭曉色開熹微焜黃老綠下掩百竿竹是
誰竹下結屋關荆扉橋無一人行樹無一鳥飛斜川折
溜凡幾轉古寺突兀樓松圍涼雲濛濛不可極懸泉直
下春林霏人家磧歷更高處水榭八九相因依武陵桃
花笑卑溼茲山避地堪茹薇當知作者意獨得能使留

題數子傳聲徽客中三伏正苦熱對此羽扇都停揮安
得天風扶我縹緲度絕磴與君攜手同振千仞岡頭衣

贈鄭簠

金陵鄭簠隱作醫八分入妙堪吾師竭來賣藥長安市
諸公衮衮多莫知伊余聞名二十載今始邂逅嗟何遲
自從鴻都石經後工者疎密無定姿任城學官闕里廟
羅列不少漢人碑簠也幽尋遍摹搨羲娥星宿撫無遺
郟陽酸棗法尤備心之所慕手輒追黃初以來尚行草
此道不絕真如絲開元君臣雖具體邊幅漸整趨肥癡
寥寥知解八百禩盡失古法成今斯邇來孟津數王鐸
流傳恨少無人披太原傅山最奇崛魚頰鷹跬勢不羈

臨清周之恒委曲也得宜勾吳顧苓粵譚漢暨歙程邃
名相持未若簞也下筆兼經奇綿如煙雲飛欲去屹如
柱礎立不移或如鳥驚墮羽翮或如龍怒撐之而箕張
昂萃各異狀屏障大小從所施平山堂成蜀岡湧百里
照耀連雲棖工師斲扁一丈六衆賓歎息相矐眙須臾
望見簞來至井水一斗研隄糜由來能事在獨得筆縱
字大隨手爲觀者但妒不敢訾五加皮酒浮千鴟我聞
此事足快意目雖未覩心已怡安得留之數晨夕醉時
竊拊醒肩隨盧溝橋北風已厲子今南去生凌漸驪駒
在路留未得歲聿其暮云誰思鍾山草堂定好在放溜
且任吳中兒華陽瘞鶴字刺露鄧尉遺樹花參差無錫

城邊見嚴四示我長歌一和之

河豚歌

天津之水連北溟七十二沽漩迴汀漁師乘春漾極浦
舳舻葉葉輕於萍河豚此時舉網得活東小大同賦形
賣不直錢棄可惜堆置更比凡魚腥南人見之莞爾笑
是物足勝通侯鯖葦蒲束取十百輩馬馱車載兼手於
晨興主人食指動忽覩兩縛陳吾庭客來疾呼莫莫莫
亟當投畀煩丁寧食熊者肥食鼃瘻豆令人重榆則瞑
彼猶無傷此獨甚犯之不異衝鈴釘主人語客且安坐
吾言物理君試聽人生一死各有候韭英棗華木葉零
即如飲啄亦分定鼎腹豈必堅關局雖云甘脆腐腸藥

不聞茹藿長延齡茲魚信毒種乃別臆胸有法食有經
或如燕子尾涎涎或如束帶腰黃鞋今之饋者皆不爾
安用荷錘薤邱冥抉精刮膜漉出血如鼈去醜魚乙丁
磨刀霍霍切作片井華水沃雙銅餅薑芽調辛撒攪醃
荻筍抽白萹蒿青日長風和竈觚淨纖塵不到晴牕櫺
重羅之麪生醬和凝視滓汁仍清冷吾生年命匪在卯
奚爲舌縮箸蠲停西施乳滑恣教齧索郎酒釀未願醒
入脣美味縱快意累客坐久心方寧起看牆東杏花放
橫參七點昏中星

興化李先生

清壽詩

世事有屈必有伸吾思遜國忠節臣詔書張目不肯草

何得復作叩頭人一時史筆授曲學壯夫氣短懦夫嗔
褒忠之典歲久闕草野論議徒紛紛棗園先生家海濬
早成進士官於鄞掖垣竹塀歷八舍抗疏豈憚批龍鱗
曾聞過江上封事神人觀聽交歡忻方黃鐵練名盡易
榜祠木末金川新電光石火雖暫照猶勝霧霧窮塵
傳之百世終不湮先生用意良苦辛邇來閉戶三十載
著書更比當年勤東京舊事孟元老北盟新編徐夢莘
藏之名山自怡悅使者徵索推蒲輪先生穩臥南溪濱
白蕉之衫紫荷巾三詔六聘催未起衡門但與沙鷗親
年今八十能抱真齒兒髮秀目綠筋立譚古昔猶斷斷
玉堂才子念明發四月正及懸弧辰袖懷蟠桃五寸核

目送海鶴千里津棗園池水風漣淪闌藥四照花如茵
五加皮酒粥面厚鳴薑鱸鯉羅兼珍烏衣不改王謝里
一門羣從稱觴頻古來傳經籍遺老者儒往往上壽臻
不見張蒼伏勝暨轅固博士江翁杜子春

柳巷杏花歌同嚴中允繩孫錢編修中諧作

頻年住 帝里一山一水何曾經有若蝸負殼又若鳥
翦翎疾風揚沙卷花去眼看春事如流星邇來罷官居
肆意尋郊垆朝從潞河還犯卯酒未醒晨過宋使君
犖留飲湯堂雙
橋東偏柳巷北小寒食後微雨零偕行者三子各各駐
輿丁杏梢含苞猶未白柳條踈地今漸青晴絲冉冉香
細細卑枝孃孃高婷婷村童灌畦愛看客轆轤井架雙

銅餅種花此地已難得那不更縛香茅亭江鄉爾時春
愈好西神山下泉泠泠闔門遊人連臂出筠車十里填
支硎只如南湖亦不惡桑鳩穀犬聲可聽紫荷花草雜
坐臥燕來竹筍生矜孍人生還家貧亦足何苦晨夕勞
其形吾儕田廬況不遠峭帆柔艣凌迴汀都籃兼攜茶
酒具悶拓小眼紅窗櫺吳歛越吟相繼和五日十日恣
留停念此令人反惆悵夕陽四顧塵冥冥

驄馬行送任御史明視齋長蘆

春明門東驄馬嘶奚官駟鑿碧玉蹄紫茸鞞鞞錦障泥
使者衣繡行長隄寒花露草煙萋萋千樹萬樹楊柳低
津門此去三百里來朝定指西沽西長蘆鹽莢通青齊

君今乘驄按左海章綬不殊還會稽我歌驄馬行君騎
驄馬去明年策馬來春明應記今朝送行處

題王給事又旦過嶺詩集

邵陽王郎媿羣雅掖垣退食吟最工關西作者儂指數
比於二李檢討因篤明府念茲誰擣雄去年使車踰嶺表笙歌鹿
鳴聽乍終滿城象犀總不顧迎潮直渡東官東循州洞
天福地兩羅浮近與泉源通晴峯四百三十二一一捧
出青蓮蓬砂牀泥融坐啞虎竹葉篆古書秋蟲千年鹿
跑草淺淺五色雀舞花濛濛盤游飯罷石樓去羣仙或
請銘新宮偕行況有屈道士大均留題肯使莓牆空此
鄉寶玉人所羨珠圓貝紫珊瑚紅王郎歸裝乏長物僅

束詩卷藏髹筒解船下瀧指湖口餘興復入匡山中僧
房五百恣登歷短筇輕屐隨樵童三條石梁貫員闕一
匹瀑布拖長虹王郎得句轉清越墨花漬壁磨鉛銅攜
來都亭曾幾日傳抄奚啻十數公要知能事久服習矢
人之矢弓人弓邇來詩格乖正始學宋體製嗤唐風江
西宗派各流別吾先無取黃涪翁比聞王郎意亦爾助
我張目振凡聾覽茲過嶺集百過豈有癡垢堪芟蕘往
時屈道士遊越山行水汎酬和同自從判袂廣武北十
載夢寐懸江楓冲虛觀前斗壇在可有鄧嶽留葛洪投
詩王郎并寄屈惜無萬里南飛鴻

程侍郎江山臥遊圖

啓禎之際南北派書有董米畫崔陳青溪先生起奪席
二者並妙稱絕倫一水一石弗湯與尺幅價值雙烏銀
今觀此圖著色老筆與黃鶴山樵親蒼茫又類井西作
林霏晻靄泉洄淪近來仿古求貌似墨石細碎添苔勻
先生畫意不畫象驅使二子窮其神雲霞石淙開四面
一一鼠尾丁頭皴山根木閣看最好安得買斷居河澹
四門博士重手澤請我跋尾歲在寅其冬偷兒鑿我壁
室無泉布牀無茵惟存文史五千卷手摩插架掀掀頻
此圖幾失幸不失留置愛玩綿冬春朝來灑墨賦長句
書報博士遲無嗔

喬侍讀萊一峯草堂看花歌同陸嘉淑周箕姜宸

英錢金甫孫致彌查慎行湯右曾陳曾毅賦

疾風經旬不出戶獨客嬾過三眠蠶今朝風定塵溘減
女牆翠湧西山嵐修門池館綴金碧鏤柵未許停羸驂
主人新拓百弓地中園卉木吾舊諳天桃濃杏雖已落
海棠乍坼丁香含初疑徑闢過者少早有勝侶齊幽探
新松四尺挂席帽炙具一束攜荆籃絲頭毯展午陰直
婪尾杯泛冬醪甘今年春較去年晚花信十猶餘二三
長紅小白枝尚亞雄蜂雌蝶飛相參酒闌回憶壯年事
於此晨夕朋盍簪燒瓷甕頭臥畢卓蠟板曲子歌何戡
滿墀明月露濯濯遶屋垂柳絲毵毵十餘年來五易主
魚牀潦盡成枯潭茅亭崩剝泥暗裂有若燕子留空龕

仙源重過豈易得惜花老去心逾貪韶光三月忽已盡
牡丹將吐房山南綠囊紅襪水精域鹿女微笑狸奴酣
相期雙屐著謝客更借一鶴騎盧耽諸君偕游恐不遂
試與二老評花擔謂周陸二子

紫藤花下醉歌同查上舍弟嗣璵賦

客舍紫藤長數尋妖蔓年多半枯槁往歲丰茸莖太密
花事去春翻草草今年二月呼園丁三百銅錢費除掃
雖然芟後花較遲漸見含苞同蕨腦檐牙朽株換棚格
井牀新汲傳栲栳景歛低垂香細細游絲不動日杲杲
鈎簾忽驚啅雀去仰面生憎土蠶抱越州老酒吳船來
小榼偏提恣傾倒頭銜久矣脫朝簿那問鼙鼙鼓昏早

惜哉筋力日已疲惟有花前不知老停杯還憶故鄉路
亂水穿沙入裴島千章古木藤纏身飄落鮓英滿衫襖
明年期爾橫漲橋上舍所居柔艣嘔啞撥萍藻綠陰共聽黃
栗留醉臥檣頭船更好

仙游茅筆歌酬徐檢討鈞

君不用鐵梳梳秋兔毫亦不用束青羊毛別揆凡材逞
妙技鼠鬚虎僕非爾曹吾聞仙游郭外山最高仙人九
鯉雲中遨紫鱗三百二十四白蝦蟆吠黃雞號有時懸
厓忽題科斗字是豈不律人間操茅田深深野火燒未
盡樵夫蕘豎赤腳騰磽嵒拔茅連茹縛作將指節六寸
之體兼頭尻桃枝竹罷火熨帖鹿角菜免膏煎熬誰與

智者初此物將母九何一范授以刻髓之蘆刀垂虹亭
長嗜奇癖一牀載得還吳艚分我一管已足豪當其運
腕大稱意筆頭公喜長堅牢人生知己隨所遭良工對
之但駭選足使李展汗走屠希逃

七里瀨

七里瀨急鳴哀湍嚴陵於此留釣壇兩崖怪石青攢攢
雨來欲上不得上竹篙撐過鷓鴣灘

常山山行

常山玉山相去百里許山行十人九商賈肩輿步擔走
不休四月溫風汗如雨勸客何不安坐湖口船船容萬
斛穩晝眠答云此間苦亦樂且免關吏橫索錢

武夷沖祐宮

武夷君異哉世所傳或云錢鏐之二子或云是魏王子
騫當時結侶高宴幔亭前此挹衣袖彼拍肩坎鈴鼓急
管絃賓雲妙曲左右仙一從彩雲散虹橋斷絕上無緣
琳宮建何時傳是天寶年後王因之禱水旱金龍玉簡
投深淵我來謁祠下取徑芝朮田入門高樹雄且妍藤
蔓曲似蛟龍纏殿古石罅仙鼠穿陳丹暗粉蝸吐涎十
二粟主配君像中間名字或已湮乾魚祭後祀典歇但
有村翁媪臘率社錢縛草爲輪翦紙爲船不知仙人倏
而來兮忽而逝雲車風馬電作鞭胡用是物東西懸長
廊曲曲通迴旋旁有道士館房房戶戶相錯連甘蕉綠

搖漾修竹青便娟竹雞聲中摘茶葉石榴樹底交茶煙
吾思此地洵勝絕道書名之曰洞天阿誰屈置一十六
何山可以居其先昔年禹平水土名山川至今苦瀆垂
虞編不聞議者糾其偏若茲次第逞胸臆母乃偽託非
真詮試質武夷君吾言然不然

虹橋板歌

板為崇安潘秀才
在東所贈

虹橋板可望不可即絕壁深藏太古色日炙不黃雨淋
不黑洪流不漂土不蝕百蟲將軍焚不得吾欲梯長林
梢恐墮鸛鶴巢吾欲駕澄潭坳恐拔千歲蛟鼉鼉倒懸
蝙蝠墜惟有怪鳥獨立時爬抓潘郎嗜奇每置青玉案
鋸贈一條長尺半為言曩者避兵接筍峯一夕急雨飛

寒空雨狂更起擲鷄風虹橋板自天半落斜拖下壓黃
冠宮爾時青童白叟悚息不出戶亟持此板歸山中吾
聞茲言吁可怪石泐金銷此不壞既非桐與檀又非榿
楠杞梓楓豫章穀紋水波蹙中央沈思是物豈無用何
況獲自仙居洵堪重當時宣和好古秘殿無爾曹吾今
藏弃足以豪試令刻作黃神越章印山行蛇虎應潛逃

壽山石歌

無諸城北山青蘄近郊一舍無楓杉中間韞石美如玉
南渡以後長封緘方輿勝覽於福州
土產首載壽山石是誰巧搨蛙蚓窟
中田忽發蛟龍函剖之斑璘具五色他山之石皆卑凡
我昔南游翫塘市對此不覺潛矜啟是時楊老善雕琢

揚字玉璿紐壓羊馬麈麕兼金易置白藤笈不使花乳求
 休攬今來價索尚三倍未免瑕漬同梅賦其初產自穠
 下里後乃深入芙蓉巖菁華已竭采未歇惜也大洞成
 空嵌非無桃紅艾葉綠安得好手來鐫劂桂孫見之不
 忍釋裹以黃葛白蕉衫伏波車中載蕙苾徒令味者生
 譏讒況今關吏猛于虎江漲橋近須抽帆已忍輸錢為
 頑石慎勿輕露條冰銜近凡朝士過關者苛索必數倍

羅浮蝴蝶歌

爾雅釋蟲名蝴蝶置不錄之蟲豈無知小大各有族小
 者槿木產江東大者乃在朱明曜真之天巖洞中當其
 物化初天與形不同蠻雲華首紫海日搏桑紅游禽五

色詎敢啄滿身香霧花濛濛仙之人兮拍手笑愛爾翩
 翩特娟妙或云葛翁衣或云麻姑裙二者傳說徒紛紛
 入秋倦飛絲乍罨葉底風搖滿山繭垂虹亭長手拄即
 栗條去年踰嶺尋鐵橋歸來雪灘纔卸馱分我蝶繭剛
 一箇留之十旬鳳子生曲腰短足相搪撐豎雙眉張兩
 翅輕於吳綃薄於紙對神光之陸離駭賦質之侷詭我
 思此蝶放之四百三十二峯前餐英嚼蕊恣歡妍何難
 大似車輪然我今縱之出簾柙可惜不諳飼花法雲母
 扇丹霞衣嗟爾萬里安得歸文章枉使負奇色不及灰
 黃粉墨野蛾高下東西飛

怪鴟行

曩時怪鴟唵嘯池上柳喪我南村詩人李十九五年不
聞汝惡聲東鄰西舍賀太平今秋胡然忽而至見之不
異眼中刺吾家阿鏐衾枕間嘆息鴟來命將逝初猶遠
林深處夜半鳴繼乃橫飛不待日晦盲搖頭鼓翼坐屋
角後咷先笑窺檐楹始知是物本為鬼伯使如俚導虎
山蹊行訓狐賊人臬食毋汝與同輩尤陰獰喚人鼃魄
亦何苦況擇善者戕其生嗚呼吾子今死矣欲不遷怒
及汝非人情聞之周官建有庭氏是氏若蒺氏射以救
日之弓救月矢必覆其巢攻其翅先王有害務盡除豈
若今人昧茲理吾將斷竹續竹彈以丸毋俾惡鳥來林
端月辰二六星四七方書去汝夫何難

君平遺鏡歌為家上舍

思贊賦

古銅一片漢所治冷光溶漾符月儀其背有文繚繞之
由中及外皆銘詩文或中斷字橫施讀之百過猶嘖
聲牙齟齒摧髯而良久始獲通其辭乃是君平之所持
惜乎未覩書年支成都卜肆新雨時若榴花分槎上枝
手挽織女機中絲以之自鑒鸞鶴姿軸簾布卦營神著
百錢挂杖足自怡酒家戶戶招青旗從游弟子侯芭師
暇日長定肩相隨識此奇字當解頤千年土蝕苔髮鬢
繡成碧綠丹黃緇阿誰磨刮無纖疵吾宗子仲性愛奇
裹以重錦導長綉大笑俗尚蟠蛟螭開奩一照冰雪肌
木魅卻走山精馳吾聞仙人鏡四規激心定志有所思

方來之事罔弗知是物度亦神所司慎莫使近粉漿
華山精舍春日遲長廊急溜鳴堦墀落梅滿地藥甲滋
主人勸飲墨玉卮相與考古恣遨嬉古來金石各有宜
其人已往文在茲金尤易爍質易虧昔賢嗜好情不移
錢志小大印官私家有款識宋傳貽七鐘九卣廿鼎彝
鐙槃刀尺別等差何哉鏡銘獨見遺嘯堂舊篆曾取斯
挂一漏百人交嗤吾今對此興不衰思搨繭紙研隄糜
急令巧匠爲裝池鏡兮鏡兮爾勿悲神物遇合信有期

盛秀才書齋觀文嘉水墨杏花新燕

宣和譜花鳥獨有燕子畫者少後來小屏山多寫白燕
梨花間大都畫粉不畫墨又或畫雙不畫隻吳中才子

文休承藝事三絕人共稱冰紋之繭恣留額新燕圖來
剛一尺其餘盡寫石田詩不許觀者翫題辭梅湖盛生
雅好事少長羣賢並邀致晴軒挂壁縱客看歎息滿堂
聲不寘圖中烏衣甫出巢杏林過雨含香苞拂羽試飛
力尚怯風前未遽踏花梢自來寫生手往往守窠白惟
有石田真軼倫同時絕品數唐寅兩君畫意不畫似嘉
也此圖亦逼真吾衰應酬詩嬾作去聲只愛看畫題長句
坐中妙繪六七公那不臨摹遺我茅堂中搖頭鼓翼尾
涎涎令我日日長相見

玉帶生歌并序

玉帶生文信國所遺硯也予見之吳下旣摹其硯而裝

池之且為之歌曰

玉帶生吾語汝汝產自端州汝來自橫浦幸免事降表
僉名謝道清亦不識大都承旨趙孟頫能令信公喜辟
汝置幕府當年文墨賓代汝一一數參軍誰謝皋羽寮
佐誰鄧中甫弟子誰王炎午獨汝形軀短小風貌樸古
步不能趨口不能語既無鸚之鵠之活眼睛兼少犀紋
彪紋好者嫵賴有忠信存波濤孰敢侮是時丞相氣尚
豪可憐一舟之外無尺土共汝草檄飛書意良苦四十
四字銘厥背愛汝心堅剛不吐自從轉戰屢喪師天之
所壞不可支驚心柴市日慷慨且誦臨終詩疾風蓬勃
揚沙時傳有十義士表以石塋藏公尸生也亾命何所

之或云西臺上晞髮一叟涕漣洏手擊竹如意生時亦
相隨冬青成陰陵骨朽百年蹤跡人莫知會稽張思廉
逢生賦長句抱遺老人閣筆看七客寮中敢吠怒吾今
遇汝滄浪亭漆匣初開紫衣露海桑陵谷又經三百秋
以手摩抄尚如故洗汝池上之寒泉漂汝林端之霏霧
俾汝長留天地間墨花恣灑鵝毛素

高麗溟賦謝納蘭院長

揆叙

若稽古帝伊耆穿九井御六螭百穀既播雨露滋蒸民
乃粒無阻飢維帝念人壽之不永稽首載拜就泰壹小
子而問之小子前致辭養生固有道曷不施楮鞭鞭百
草嘗其平毒審其寒燠

鳥皓切

別君臣異溼燥或冬而萌

或夏而槁豐者第蔓者抱鼎用飪白用擣咀三百六
十五味著為本草經授諸醫生俾讎討山娟娟兮樹濛
濛爰有紫衣童子歌宵中瑤光之宿帝車尾散為仙卉
三極五葉各一叢人銜鬼蓋海腴名不同是為土地精
肩股各具體有時黃口兒土中啼不已高高羊頭岡深
浚虎穴底立苗團紫雲結子墮紅米晉上黨趙邯鄲遠
而新羅百濟根結蟠我昔於高麗圖經曾覽觀胥餘啓
宇後朝鮮世世稱外藩森羅三千七百島四至八到提
封寬城中生蔓類羊角其上椶樹清陰攢春州產尤嘉
堅白少垢癥聞諸遼陽土木搨地先以熱湯野爐煮何
異都蔗去汁方登盤此邦之人日炙風戾乾元氣不損

形神完珍藥豈易得恒愁致者難納蘭學士相於久憶
別重逢歲在酉三面山臨一面江學士游韜
光句也誦君清詩
不去口今春 鳳艦復時巡扈從依然八十一車後朝
來帳殿喜合并憫我形枯貌鰲醜分我神草凡百莖投
之几案鏗有聲五加一把安足道愛玩不異懷中瓊服
之洗憂恚定心氣益神智還精髓失笑頗類西域之駱
駝口不能嚼左右齷老眼秤星渾不辨刀圭約畧付銜
鑰作詩報學士奇觚急就有媿盧仝馬異劉义何
吳甥 振武 用指頭作畫花竹翎毛草蟲山水畢肖
異而賦長歌
軒皇曾列素女圖虞帝欲觀古人像禹鑄神姦貢牧金

康模醜酒豐侯相周官設色之工五畫繪由來有專尚
彼時蒙恬筆未製安得中山管城樣不知渲染用何物
藻火山龍授師匠指頭作畫舊譜希巧者未述知者勑
吾家賢甥罷官久玉桂國中少倚仗林泉高致頗軼倫
往往得錢掃屏幃入春放溜始歸來啜菽承歡北堂養
田園松菊縱荒蕪且免折腰走俗狀蕭晨訪我梅會里
小艇恰乘新水漲開顏並對竹垞竹一枝尤精難比伉
先施淡墨後濃墨食指兼需巨擘將有時爪痕抽藥苗
有時指節成花當雪禽不數唐希雅風蝶何殊秦友諒
少焉滌硯寫山水茅屋苔磯雅清曠斯須湧出八九峯
瀑布飛流樹穿浪釘頭鼠尾信手皴程奕屠希見惆悵

漆園以指喻非指天地一指巧相況覲爾新圖捫指成
使我衰年一神王移家思避消夏灣歲旱湖田定無恙
角里黎容客至嘗毛公壇許人扶上橙黃橘綠及是時
十幅蒲帆趨所向甥能從我賦近游共醉山家隔年釀
五毒篇效曹通政寅用其首句

南蟲毒頭北蟲尾以類名虫總為蟲五者潛行疾如鬼
誰與點筆繪作圖一一獍劣殊形模五月五日張戶樞
嗚呼之蟲螫人遇所觸謀及乃心禍斯酷世間無如倮
蟲毒

紀夢作

北山叟卜南山宅言歸北山人不識山家黑犬兩耳黃

梅會詩選卷三
獨木橋邊吠行客柴門之下水淙淙枳籬以外花茸茸
偶然鞭犬失青竹化作羊須一白龍

梅會詩選卷三

梅會詩選卷第四

李稻塍編次

竹垞今體詩一百十七首

曉入郡城

輕舟乘間入繫纜壞籬根古道橫邊馬孤城閉水門星
含兵氣動月傍曉煙昏辛苦鄉關路重來斷客魂

暝

暝投人外宿桑柘藹陰陰獨樹歸禽少平川隱霧淡松
篁初月上鐘磬夕陽沉漸覺微風起寥寥山水音

春晚過放鶴洲

問訊裴公島春來幾度遊古牆修竹上潭水落花浮煙
雨無人境山泉放鶴洲鷗夷今不見往事問漁舟

雨後即事

一雨平林外羣山倚杖前蛙聲浮岸草鳥影度江天鳴
磬上方寺揚帆何處船坐疑秋氣近蕭瑟感流年

野外

野外疎行跡深林客到遲江湖殊後會風雨惜前期秋
草飛黃蝶浮萍漾綠池南樓夜吹笛寥落故園思

晚

白屋生寒早蒼煙向晚陰松門清磬遠楓岸夕陽深坐
聽農人語多諳靜者心荆扉猶未掩倚杖數歸禽

夏日閒居同范四路作

蘭草羅含宅蓬蒿仲蔚園桐陰初覆井瓜蔓漸踰垣歸

鳥檐前樹斜陽嶺上村無家昧生計漂泊信乾坤

八月十五夜望月懷陳大忱

明月生滄海天橫一氣中遙憐今夜客相對與誰同應
有良朋過銜杯學孟公思之不得見清露小庭空

懷鄭明客淞江

連江楓樹外煙水隔層波歲暮飢寒逼荒城雨雪多故
人居谷口策馬去山阿幾日離居恨還應獨嘯歌

寄胡明府振芳

老去甘垂釣秋深嘆轉蓬虛堂驚蟋蟀涼露滿梧桐隱
吏思梅福忘年得孔融飄零方有日清宴幾時同

治平寺

招提下山路一逕轉迴塘塿影開初地鐘聲落上方陰
崖深樹綠斜日亂峯黃湖上扁舟與沉吟意不忘

南湖即事

南湖秋樹綠放權出迴塘簫鼓聞流水蒹葭泛夕陽心
隨胡鴈滅目斷楚雲長惆悵佳人去憑誰詠鳳凰

送十一叔遊中州二首

木葉下亭皋西風一鴈高驅車千里道結客五陵豪河
水浮官渡關門鎮虎牢驪駒方在路尊酒意徒勞
旅館涼風起秋城畫角哀天涯方遠客祖道且深杯山
色陰中出河流繞吹臺梁園多雨雪歲暮好歸來

哭王處士翊六首

書信傳初到銘旌已在途今來紛涕淚昔別念須臾迢
遞悲長道艱難喪老儒山陽懷舊賦流恨滿江湖
遠道將歸客孤舟返舊林招魂迷楚水臥病絕吳吟夢
裏羅含鳥囊中陸賈金猶憐別時語悽斷故人心
江海飄零日秦川喪亂餘淒涼蒿里曲生死秣陵書零
雨沾青草高原哭素車南山桂搖落無復子雲居
知己從今少平生負汝多人生看到此天道復如何流
水笳簫曲悲風薤露歌王猷竹林在舊徑不堪過
落日明丹旆飄風卷總帷途窮偏作客身老獨無兒書
籍今何託人琴不可知高山空有調回首失鍾期
相送悲長別還家慘獨行流連簡書扎次第念交情自

有篋中作何難身後名泉臺應快意未必似平生

七月八日夜對月

素月弦初直清宵漏轉添乍堪盈手贈無復兩頭纖影
動明河鵲涼生碧海蟾玲瓏看不定試上水晶簾

八月十三夜汎月太湖

為愛清秋月中流獨扣舷艱難羣盜路寂寞五湖船白
髮從今夜青山憶往年酒闌愁不寐相顧意茫然

十七日夜月

待月涼宵靜更深醉玉缸空城懸北斗流水入西江落
葉紛無數驚鳥起一雙高樓思蕩婦茲夕定當牕

旅興呈舍人五兄二首

舊宅烏衣巷涼秋白苧歌湖山歸路遠風雨閉門多暗
壑隱松桂深潭漂芰荷美人日遲暮芳草奈愁何
旅館三秋客端居百慮違張衡長不樂王粲竟無依夜
月彈長鋏涼風歎短衣天涯芳草盡我馬亦懷歸

蕭山道中

古樹參差暗春禽旦暮鳴東西開水市高下築山城翠
竹千家靜清江二月平昔賢栖隱地巖壑有同情

蕺山亭子

石磴層層上憑高四望同君王遺跡在寂寞古亭空綠
水人家外青林島嶼中昔年生聚日辛苦舊江東

金山登妙高臺

高臺堪極目落景一登臨
衆水金陵下孤城鐵甕深
平沙依鴈宿橫笛想龍吟
不見安禪叟寥寥江上心

望湖亭對月

山色匡廬近湖光彭蠡開
異鄉頻見月孤客乍登臺
遠樹霧中失浮雲川上來
離心似黃鵠中道一徘徊

虔州懷古

橫浦樓船靜西風草樹彫
城荒百戰在地入九江
遙豪傑爭先後山陵慘寂
寥鬱孤臺下水流恨自南朝

東官客舍屈五過譚羅浮
之勝時因道阻不得游

悵然有懷作詩三首

錄一首

傳道朱明洞堪留白石樵
鸞鳳曾可御蛇虎為誰驕
細

草香金澗寒雲束鐵橋
梅花清夢斷彼美罷相要

三水道中

浦樹高原盡人家負郭稀
夕陽明斷塢風色上征衣
老馬長途伏飢鷹側翅飛
寒江日西下不送北船歸

席上畱別陸兄

世楷

但秉中宵燭重為旅客唵
驪駒即長道絲竹本哀音
越嶠停雲遠秦關落日陰
無勞岐路別酒坐已霑襟

謁張曲江祠

峻坂盤神樹陰崖鑿鬼工
芳塵羽扇冷春燕玉堂空
不覩關門險誰開造化功
經過遺像肅千載嶺雲東

還家即事四首

回首辭江海驚心念物華漸看鄉樹近彌覺旅程賒避地虛留井無田學種瓜重為廡下客慙媿說還家

遠客朱顏改高堂白髮新長貧謀半菽幾日且兼珍遂有耕田計無勞陟岵頻南陔蘭可采眷戀及良辰

卜築仍無地來歸轉自憐癡兒猶昨日病婦已連年扇有蒲葵攬牀移莞蕝眠濁醪供取醉不向酒壚前

至此猶餘悸於焉暫息機不辭新蠟屐重理舊鶉衣鬼笑劉龍拙車看表紹非生還良已幸長鋏幾人歸有介履安

同杜濬汝言屈大均三處士放鶴洲探梅分韻

徑轉叢篁曲谿回石磴斜為園傳故相唐相裴休別業勝事復

吾家晚日吹山雨陰雲覆浦沙春風三百樹猶有未開花

送汪進士挺游嶺南

獻歲發吳閫緣流抵建康北風吹五兩幾日上潯陽榕葉山城暗梅花驛路長回思舊游地飛夢到君傍

別杜濬

石城烽火後孤客轉浮沉乞食來吳市為園失漢陰襄陽耆舊傳荆楚歲時心還復扁舟去淒其洛下唵

柯山

柯亭山下路修竹暮紛紛衆壑千尋暗雙崖一徑分沙光明草樹日氣冷江雲更憶中郎笛寥寥不可聞

吳興客夜

東武亭邊樹棲烏夜半啼江清楓葉下天闊鴈行齊不
寐仍杯酒勞生此杖藜誰家采菱調髣髴度前溪

由碧浪湖汎舟至仁王寺飯句公房

我愛仁王寺來從碧浪湖到門千樹合登閣一峯孤仙
梵迷高下香雲忽有無坐愁風雨至還與飯秋菰

白雀寺

竹徑何年寺松門百丈巖野雲平石磴江日冷楓杉水
落青蓮湧花飛白雀銜五湖看在望生計有蒲帆

舍弟

彝鑒

遠訪東甌喜而作詩

急難逢令弟訪我自江東頓喜羈愁豁兼聞道里通晴

江空翠裏春草亂山中知汝南來日西陵定遇風

雨

城晚吹煙霧風迴渡水雲入林初漠漠潤礎旋紛紛響
愛青荷葉涼思白練裊西堂有官燭更遣夜深聞

九月十四夜月

坐惜如珪月懷人歷九秋關山仍遠道西北有高樓苦
憶前溪別應添少婦愁清輝憐玉臂獨自下簾鉤

返照

返照開寒峽江城入翠微明霞飛不落獨鳥去還歸是
處聞吹角高樓尚曝衣山家多畏虎應各掩柴扉

雲中客舍曹武備自津門以筐鱉銀魚見寄賦謝

二首

千里三沽使傾筐異味傳霜螯初入手臘月更須憐重
馬愁關吏香杭憶野田江鄉好風物罷酒數歸年
水族殊鄉至明燈夜不孤雪花寒意減玉盃近看無反
厭流匙滑宜將賸酒沽遙憐垂釣客白首向江湖

絕塞

絕塞衝寒起妖星逼歲除幾時離畢昴三見改蟾蜍我
友官中禁憂時獨上書謂楊給事雍正時上疏言彗星見宜修省由來天道
遠垂象果何如

晚次崞縣

百戰樓煩地三春尚朔風雪飛寒食後城閉夕陽中行

役身將老艱難歲不同流移嗟鴈戶生計各西東

食半翅二首

賦物憐窮鳥營飛日幾迴遠依黃鼠穴低搶白龍堆不
用深弓射恒愁短翼摧年年隨凍雀重馬紇干來
味合添雛筍羹宜配凍醪登盤人未識入肆價須高且
緩思鴉炙全勝食雉膏莫愁嘗易盡讒鼎戒貪饕

題高六柘塘移居圖

伍員吹簫市韓信垂釣臺昔賢曾混跡之子亦多才落
月搖鄉樹清淮上酒杯誅茅三徑在高詠日悠哉

華不注

仙梵開初地春秋識舊名青蓮齊吐萼石筍獨抽萌泉

憶邊庭實居連許殿卿淒涼懷舊意驅馬入荒城

淮水弔韓淮陰

淮陰師十萬曾此擊龍且廢壘人猶識囊沙水漸淤生

慚諸將伍死並列侯書千載烏江廟君臣反不如項王

廟以范增龍且配食

鄒縣謁孟子廟二首

井地連滕壤詩書近孔門世儒多橫議夫子獨知言楊

墨歸斯受齊梁道自尊巖巖留氣象千載肅心魂

壞道殘碑臥祠官異代虔爵班公一位里紀母三遷叢

木冬春冷風燈卒史懸空令布衣士瞻拜獨淒然

飲歷下亭泛舟蓮子湖作二首

濟水來王屋源泉處處清自從湖口入不復地中行柳

岸鳴蟬急荷風浴鳥輕江南歸思緩髣髴擢歌聲

海右亭仍在城隅路不賒竹深池館靜山轉柁樓斜小

隊千行柳行廚五色瓜未愁霑席雨歸擢豁晴霞

同紀處士 映鍾 杜太史 鎮 譚舍人兄 吉聰 集孫侍

郎承澤 研山齋四首

勝序愁初豁高齋近許過圖書留客少花藥閉門多興

每耽邛壑衣從挂薜蘿千秋論述作出處本同科

啓事東曹後名山歲月深論交半縫掖真樂在抽簪遽

有忘年約虛陪作者林寥寥知己語一一感人心

野趣行無次林棲坐不辭書看金薤出杯喜竹根持戶

牖分今古朋游隔歲時齊東回首望最憶虎頭癡謂顧子炎也武

改席塵逾遠看花徑轉幽猶存漢金石不廢晉陽秋客已呼沉醉誰當續後游六街分手緩歸騎夕陽流

立春日同李十九飲孫少宰蟄室有懷曹侍郎在里

七度辛盤會他鄉歲歲殊未如今夕讌得與故人俱舞鶴喧庭榭飛花灑畫圖因懷鋤菜叟萬里隔春蕪

題退谷

退翁愛退谷未老先抽簪行藥亂峯路築亭雙樹林閑中春酒榼靜裏山泉音滿目市朝貴何人期此心

雨度仙霞嶺

縹緲江郎石朝來竟不分客愁偏暑雨祠古但寒雲小市兵戈盡飛泉下上聞泥塗雖自苦暫喜遠人羣

泰安道中曉霧

苦霧滴成雨平林翳作峯不知巖際寺恰送馬頭鐘汶水已爭渡泰山猶未逢忽驚初日躍遠近碧芙蓉

龔尚書輓詩八首

坤維初震後元老忽淪亾九日地震越三日公沒已定春帆計翻

教夜壑藏把杯人未散戀闕意堪傷盛德今徂謝悲看

大鳥翔

西掖存封事南天返使車位仍三獨坐職半六尚書典

禮真無忝論文盡不如最憐羣弟子入揖共欵欵

九日龍潭讌招尋自此休公每歲九日讌客賦詩於黑龍潭遲歸因酒

債垂死及山遊九月七日公扶病游萬壽寺別袂何曾把時余赴通州詩

篇總未酬重來清淚迸風急總帷秋

京華留滯久恒苦出無車記憶惟公切過從聽我疎頓

忘何日別急簡舊時書賸有雷塘句臨岐禱飲初辛亥

余從京師至揚州公以詩贈行

墨自臨池妙詩先過嶺工換鶯何太苦刻燭未教終正

練題長遍聯篇思轉雄要知作者意肯與古人同

別有新詞麗樽前賦物華歌翻舊桃葉笛按小梅花檀

板柳三變金荃溫八又江南腸斷句回首向誰誇公最賞余

阻風湖口詞

含玉遺孤在招魂上客存天邊丁令鶴夢裏謝公墩笳

吹將歸路田廬何處村應同鍾太傅丙舍寄諸孫

已輟青門餞空憐白馬留九京應萬里百口但孤舟逝

矣名須易傷哉涕莫收寄聲縫掖賤休作帝京游

王尚書崇簡招同錢澄之毛會建陸元輔陳祚明

嚴繩孫計東讌集豐臺藥圃四首

上苑尋幽少東山載酒行發函初病起出郭始心清一

老風流獨羣賢少長并甘從布衣飲真得古人情

水淺孤村外亭開萬柳中流觴過上已卷幔已南風旅

話江湖別幽期出處同接羅拚共倒舉手對山公

山田圍輞水左右出豐臺是日孤亭坐繁花四面開蟻
浮傾更滿蝶舞去翻來即事多高詠天涯不易哉
麗草攢紺蕊晴風卷絳雲井華宜近汲衣桁忽斜曛興
自抽簪發人因睹墅分重過知不厭歸騎且紛紛

元日 賜宴太和門

垂衣逢盛際輯玉盡來庭白醞三光酒青歸一葉蕓新
年 恩較渥昨日醉初醒九奏鈞天曲風飄次第聽
是夜 賜內紵表二裏一

元老傳 天語殊恩及侍臣禮優加束紡價重抵雙銀
笈答妻孥問爭尋剪尺頻光風今歲早春服最宜人
十五日 保和殿侍食

露草詩歌雅雲天易象需不圖大酺樂獨許小臣俱注
盃茶膏滑堆盤菜甲殊歲除曾幾日四度飫 堯廚

是日再入 保和殿侍宴

乍 賜晨餐出仍容午宴陪一夫馳秉翟七校下傳杯
妙舞娑顰歇華鐘取次催分明衣上月攜自九宵回

恩賜 禁中騎馬

魚鑰千門啓龍樓一道通趨翔人不易行步馬偏工鞭
拂宮鴉影衣香苑柳風薄游思賤日足繭萬山中

納臘侍衛 性德 輓詩六首

驟聽黃鷄唱驚隨白馬來百年嗟輟瑟五日尚銜杯泉
下知安往人間信可哀退朝憐相國封篋忍重開

通籍題擅筆承 恩改鶚冠射鳥天一笑走馬路千盤
禁直昏鐘入廊餐午箭殘傷心倚閭望東第少歸鞍
出塞同都護論功過貳師華堂屬續日絕域受降時悽
惻傳天語艱難定月氏歛魂猶未散消息九京知
屈指論交地星終十二年斯人不可作知己更誰憐翠
漸深門柳紅仍膩渚蓮舊游存益少悽斷小庭前
主客披圖得雲煙過眼諳唵花成絕筆聽雨罷深譚
裏韶顏在樽前綺語耽憑將腸斷句流轉到江南
別悔從前易途傷此日窮迴腸歌哭外搔首寂寥中迹
埽孤生竹枝摧半死桐自今觀物化不詆釋門空

顧編修

藻

以橄欖見遺賦謝二首

疊果青於棗嵇含狀最工紅鹽齊落子翠竹遠開筒愛
惜教頻數歡娛忘屢空要知君子意獨許歲寒同
絕勝餘甘樹來從荔子村玉盤盛最好青箬裹猶溫酒
後酸漿別茶中俊味存清香留改歲試配煮河豚

夜宿天寧寺大風和徐四處士

善韻

檻外開皇堦三千六百鈴天風吹不定一夜枕函聽砌
咽寒蟲語窗搖獨樹形故人眠未穩吟傍佛燈青

玉山

三衢山歷盡橋影跨通波十室居城少千家負郭多啓
顏津市酒隨意榜人歌且免書驢券郵籤次第過

廣信

信州風物好倦旅亦開顏灘響層層石林疎面面山狎
鷗飛不去放犢飲初還夜火浮橋外連船當戶櫺

鉛山

不遠江城路舟師指點遲穴山巢鶴鵲編竹坐鷓鴣晚
飯惟三板朝醒藉一瓶鵝湖酬和地百世起人思

弋陽

城小斜依壁門開近面江陂仍仙令跡歌換楚人腔辣
關山無樹崢嶸石滿瀧多情甄塿影十里逐蓬牕

貴溪

亭榭均干越封圻析上饒連山齊覆釜獨石忽成橋想
見黃梅發何曾碧樹彫降邱誰宅此鷄犬已寥寥

安仁

畫角衝寒動明星際曉行水迴沙市曲山到郭門平野
碓啞啞轉漁榔杳杳鳴誰與分百里洵美得嘉名

瑞洪

餘干江路永回首失蘄岳市酒難為醉曾魚乍解饒

山至安仁捕魚多用烏鬼魚皆無味至此始用曾湖寬舟愈小峯遠日初銜漸

識宮亭近分風及布帆

青浦道中

不識三高士松門第幾峯潮回黃歇浦草滿陸機茸細
雨春歸鴈深山日暮鐘坐看城郭近猶是水雲濃

崇安孔明府招飲縣齋池上賦贈二首

宛轉橋當戶玲瓏竹引泉官齋如此少地主況能賢白
鳥巢琴閣紅鱗動酒船盡驅胥史往清話得纏絲
一縣皆山水尤奇是慢亭從君乞小艇導我入迴汀羽
蛻黃心木苔皴白石銘遺文當不少歸日補圖經

汪學使薇餉楓亭荔

香荔誇奇絕楓亭古驛中色雖殊挂綠品已壓輕紅一
種生偏側千房味不同重煩故人意分減及衰翁

長水曉行

月暗千里樹風微一葉舟殘星高太白重露滴牽牛菽
乳新漿熟魚標小市收不知葭莢岸吠蛤爾何求

除日二首

感念亾兒苦難收淚兩行夢中猶定省歲杪益淒涼禿
筆堪成冢遺書尚滿牀多情酒壚伴作賦比山陽

上舍顧仲

清咸三文學金介復俊民戴
鏌淑章李宜景濂俱有輓章

典祀先人臘蕭然魚菽存薦時煩寡婦拜後止童孫老
分歡娛少閒將甲子論知無頌花客未暝闔蓬門

同徐吉士昂發陸上舍稹沈秀才翼過普賢僧房

茶塢山根寺經營景定年尚存行在牒未改梵王筵竹
覆空池冷松排老樹圓天平知不遠留酌白雲泉

南垞晚步同王生滋

荷風剛罷浴蘭畹已新涼高樹下歸鳥小窗明夕陽蛇
牀秋草徧魚尾暮霞長老圃論生計纔收一稜薑

寄查山張上舍二首

錄一首

昔訪查山麓梅花香滿頭筠車三日坐日日醉層樓八
載負前諾今年春可遊老夫無那嬾風雨返孤舟

岳忠武王墓

宋室偏安日真忘帝業艱但愁諸將在不計兩宮還鄂
國英雄士淮陰伯仲間策名先部曲薄伐自江關赤縣
期全復黃河度幾灣龍庭生馬角雪窖視刀鐶城下盟
何急師中詔已頒盈庭尊獄吏囊木謝朝班相狡妻兼
煽和成主愈孱長城墮道濟大勇卷成覲舊井銀餅失
高墳石虎閒銘功存版碣鑄像列神奸曠世心猶感經
過淚獨潛傳聞從父老流恨滿湖山朔騎頻來牧南枝

尚可攀墓門人寂寞江樹烏緡蠻宿草經時綠秋花滿
目斑依然潭水月終古照潺湲

顯皇帝大閱圖為吳金吾國輔賦并序

萬曆初太師張文忠公居正秉國勸駕大閱時兵部

尚書吳公允實典禁旅俾圖以傳子孫錦衣都督同

知國輔尚書曾孫也出以觀客圖長三丈餘內自宮

闕外至陵寢極於沙漠止焉繇是萊陽宋琰作賦南

昌王猷定作記而彝尊作詩以述之

神廟垂衣日江陵總百官揆文先奮武慮亂本居安殿
上蕭何履朝中貢禹冠孫通明禮樂方叔莅師干駕馭
英雄在超騰士馬驩車徒看翼翼禁旅尚桓桓畫史真

能事披圖得鉅觀丹青榮顧愷宮室擬胡寬歷歷開城
闕高高疊井榦虛無凌倒影縹緲結重欒太液波還靜
長楊露未乾妝樓原自鑠圓殿不禁寒仙仗移平樂霓
旌擁上蘭忽驚千騎並旋訶六營團作氣陳金鼓前驅
建玉鑾輕雲承翠蓋麗日表朱竿遂列堂堂陣爰升將
將壇小侯班四姓大閱用三單紫燕雙絲絡花驄七寶
鞍呈能羣角觝教射集星弁解飲籌無算饒歌曲漸闌
行知塵冉冉歸想佩珊珊遠勢工尤極平原繪更難蕭
疎連板屋迢遞出峯巒百里生毫末諸陵望鬱盤薊門
無埃火函谷有泥丸元老謀猶壯諸孫手澤完錦題探
篋笥湘簟展琅玕對此成希覲因之感萬端雨煙飛蜀

錦霜雪皎齊紈賦愧王延壽謠同梁伯鸞儀章長在目
珍重歲時看

于忠肅公祠

昔在狼山下軍書犯近垆六師輕朔漠萬騎失雷霆土
木塵長滿龍蛇歲不寧豆田沙浩浩黍谷路冥冥濟世
須元老長材總四溟從容持國計指顧悉兵形瑕呂安
羣議劉琨表外廷嗣王仍歷數高廟有神靈旣罷金繒
款無煩白馬刑北轅旋翠輦南內啓朱扃命已甘刀鑊
功真溢鼎銘春秋隆代祀俎豆肅維馨一自輶車至難
期埃火停遺墟愁戰伐大樹日飄零碧草空祠長黃鸝
過客聽霜鐘沉曉月風牖繞明星卞壺誰修墓巫陽數

梅會詩選卷四
降庭讖還思雨帝碑欲墮江亭遠水澄湖碧流雲暗壑
青千年華表鶴哀怨此重經

謁劉文成公祠

草昧經綸日英雄戰鬪年真人淮泗起王氣斗牛躔命
世生良弼卑棲役大賢一官齊簿尉千里正戈鋌記室
依袁紹飛書謝魯連神鷹思飽掣威鳳必高騫漢祖除
秦法周王卜渭畋廟堂才不易束帛禮宜先遂有君臣
契能令帷幄專南征頻克敵北伐旋摧堅王會收三統
軍謀出萬全河山分帶礪冠蓋儼神仙未辟留侯穀長
辭范蠡船麒麟當日畫竹帛後時編一自邛陵改重愁
歲月遷隆中猶故宅絲上少封田舊俗還祠廟清歌入

管弦黃金遺像蝕鐵券幾人傳古瓦甍鼈落荒庭檜柏
圓蛛絲虛寢罨鳥跡斷碑眠想像陰符策沉唵寶劍篇
前賢餘事業後死尚迤邐去去辭枌梓栖栖到海壖空
林多雨雪哀角滿山川玉帳無遺術蒼生久倒懸憑留
一黃石相待穀城邊

梅會詩選卷四



